

Rivella regala 50 000 francs a la giuventetgna rumantscha

Avant 50 onns ha Robert Barth preschentà la nova bavronda «rivella»

■ (anr/vi) **Mintga Svizzer baiva radund 11 liters rivella ad onn. La bavronda preferida da nosa naziun ha quest onn in «natalizi radund». Dapi 50 onns datti la «aua» melna en la butteglia brina cun l'etichetta cotschna. E perquai che la fatschenta marscha bain, regala la «Rivella SA» a tschintg organisaziuns mintgamai 50000 francs.** Igl è organisaziuns da la cultura, da sport e da giuventetgna. E per ina giada na han ins betg emblidà la quarta lingua. Anzi, la «Giuventetgna rumantscha» (Giuru) ha retschavì ier 50000 francs. La surdada ha gì lieu a Turitg a chaschun d'ina conferenza da medias.

«Rumantschs baivan rivella»

«Jau savev che nus survegnian ina brava summa», ha *Armin Duff*, il president da la Giuru, ditg ier suenter la surdada. Tuttina èsi la finala stà ina surpraisa per Duff che la «Rivella SA» è sa mussada uschè generusa. «Quai dat a nus la libertad da far ils proxims dus onns plirs projects.» I sa tracta da chausas che la Giuru leva per part gia daditg realisar. Fin uss mancavan dentant adina daners.

Prender a maun vul ins p. ex. in comic. Cun in auter project vul la Giuru promover pli fitg la scena da film rumantscha. Perquai duai vegnir installà in post da material da film. Là po la giuventetgna p. ex. prender a fit ina

camera per in pitschen pretsch. Duff less era schlargiar la pagina d'internet da la Giuru ed ev. datti anc in disc cumpact.

Cuntent è il president cunzunt che la giuventetgna rumantscha na dovra in temp betg pli far pensiers per sia gasetta «Punts». Cun lezza vegnian ins adina «al limit finanziar», di Duff. Ins stoppia adina quintar sch'i tanschia per la proxima ediziun.

E dal reminent, davent dad ier è il nov motto dal president da la Giuru: «Betg sulet sportists, ma bain era Rumantschs baivan rivella!»

Dr. Barth e Süsli, ils babs da rivella

Avant pli che 50 onns avess *Robert Barth* probabel strusch pensà ch'el saja in di possessur d'ina firma cun tant success sco la «Rivella SA». El era student da giurisprudenza cura ch'el ha chattà per schabetg ina receptura da far sin basa da scharun ina sort gervosa u bavrondas senza alcohol. L'idea ha fascinà il giuvenum, ed el ha cumenzà a far experiments en il tshaler da ses geniturs. Ma prest ha el vesi ch'el na vegn betg a frida senza agid d'experts.

El è s'adressà al manader da l'institut da latg a la Scola politecnica federala (SPF/ETH). Lez ha fatg enconuschent Barth cun l'assistent Hans Süsli ed ha dà ad el l'incumbensa da perfeziunar la receptura. Cun scharun, zutger,

ervas, extracts da fritgs ha Süsli lura sviluppà ina bavronda senza alcohol che vegniva producida tenor las pli novas metodos tecnicas da lez temp.

Intginas cifras

Suenter è tut ù fitg spert. Anc avant avoir finì ses studi ha Barth fundà sia firma «Milkin-Institut Robert R. Barth» a Stäfa. Da la partida sco pionier era medemamain Hans Süsli. Il 1952 han els preschentà a la pressa ed a la gastronomia la nova bavronda rivella. L'emprim resun era bun – schizunt la NZZ ha ludà la sanadavla bavronda.

En il decurs dals proxims tschintg decennis è la fatschenta sa sviluppada. Ils emprims onns aveva la firma 20 collavurators a Rothrist. Oz dumbra la fatschenta radund 270 emploiads e la svieuta annuala munta a 140 milliuns francs. Da fitgar pe en l'exteriur n'è mai grategià a l'interpresa. Persuenter ha ella gì success cun la marca «michel» per sucs da fritgs. 11 milliuns liters suc da fritgs ed 80 milliuns liters rivella ad onn venda la «Rivella SA». Dapi l'atun 2000 maina la segunda generaziun l'interpresa da famiglia. Robert Barth ha surdà a ses figl *Alexander Barth* il presidi dal cussegl da fundaziun. Il possessur da la «Rivella SA» resta dentant anc adina il pionier Robert Barth sez.



Il president da la Giu Ru, Armin Duff (sanester), ha pudì retschaiver ensemen cun trais represchentants da las ulteriuras parts linguisticas da la Svizra in schec da 50000 francs da l'interpresa Rivella.